

MLANGO WA 1

UPENDO UNAPODHIHIRIKA

 Habari za jioni, wapendwa. Ninapenda kuwazungumzia usiku wa leo juu ya somo “Upendo Unapojoitokeza, Neema inaingia kazini.” Nikichukua somo langu kutoka katika Yohana Mt., mlango wa 3, kifungu cha 16: “Kwa maana jinsi hii Mungu aliupenda ulimwengu, hata akamtoa Mwanawe pekee, ili kila amwaminiye asipotee, bali awe na uzima wa milele.” Andiko hili linahusu upendo, nasi tunajua ya kwamba hakuna nguvu, wala hakuna fundisho, ama kanuni, itakayofikia upendo wa Kikristo wa Mungu. Hakuna mtu anayeweza kuelezea upendo wa Mungu, ingawa wengi wamejaribu. Washairi na watunga nyimbo wameshindwa, na sisi, kama wahudumu, tunahubiri upendo wa Mungu bali hatuwezi kuuelezea kikamilifu upendo Wake wa ajabu sana. Mshairi mmoja aliandika juu ya upendo wa Mungu namna hii:

Kama bahari zote zingalikuwa ni wino, na
mbingu ziwe zemetengenezwa kwa karatasi,
Na kila unyasi duniani uwe ni kalamu, na kila
mtu awe kazi yake ni mwandishi,
Kuuandika upendo wa Mungu aliye juu
kungalikausha bahari zote,
Wala gombo lisingeenea kote, hata
likitandazwa kote mbinguni.

Mara nyingi nimewazia juu ya yule mshairi mashuhuri aliyeuandika huu:

Tangu kwa imani nilipoona kile kijito
kilichosababishwa na majeraha Yako
yaliyobubujika damu,
Upendo wa ukombozi umekuwa ndio
wimbo wangu, na utakuwa hivyo mpaka
nitakapokufa.

Nafikiri kama kuna jambo moja linalohitajika katika kanisa kuu la Mungu la ulimwenguni mzima usiku huu, ni upendo. Hatuhitaji karama zetu na mihemko yetu sana sana kama vile tunavyodhani tunahitaji hayo, ingawa ni za kustaajabisha sana na tunampa Mungu sifa kwamba tunazo—bali kama karama hizi hazitawaliwi na upendo hazileti matokeo yatarajiwayo.

Upendo unapaswa kutawala nyumba—nyumba isiyoadilishwa na upendo si nyumba nzuri sana. Kama mume na mke hawapendani kwa dhati, hawawezi kuaminiana.

Kumbuka, upendo ni kani yenyenye nguvu sana ulimwenguni—na badala ya kuweka imani yetu juu ya mhemko fulani, ambalo ni sawa—ama juu ya karama fulani, ambalo ni sawa—kama vile kupiga makelele ama kunena kwa lugha, nk., tunapaswa kuweka imani yetu juu ya upendo wa Mungu. Inatupasa kurudi kwenye kanuni hii—upendo kwanza, kisha mambo hayo mengine. Kama tungalifanya jambo hili makanisa yetu yangeendelea haraka zaidi, kwa kuwa Mungu ni upendo.

Sasa upendo una maana mbili tofauti, pamoja na maneno mawili tofauti ya kuuelezea. Katika neno la Kiyunani upendo mmoja unaitwa “fileo”—huo ni upendo wa kawaida ambaa mtu ungekuwa nao kwa ajili ya mke wako; bali upendo wa “agapo” unamaanisha upendo wa kiungu—na pendo hizi mbili zinapingana sana. Kwa mfano, kwa upendo ulio nao kwa ajili ya mke wako, kama mwanamume angaliutusi ungemuua papo hapo—huo ungekuwa ni upendo wa fileo; bali kwa upendo wa agapo, ama upendo wa kiungu, ungeiombea nafsi iliyopotea ya mtu huyo. Hiyo ndiyo tofauti yake. Karibu nina hakika wengi wetu wamedanganyika kwamba wana upendo wa fileo, na wafikiri kwamba ulikuwa ni upendo wa agapo. Upendo wa fileo ni wa kiakili, ambapo upendo wa agapo unatoka moyoni. Upendo wa kibinadamu, au upendo wa mahaba, unatokea akilini—upendo wa Mungu unatokea moyoni. Sasa upendo wa fileo daima utatilia shaka na kuhoji, bali upendo wa agapo daima utatulia na kuwa katika amani. Upendo wa kibinadamu daima unahojoji—upendo wa Mungu haufanyi hivyo kamwe. Upendo wa kiungu labda ni vile ulivyo katika uaminifu wake, pia unasababisha imani wakati unapompenda mtu kwa upendo wa Mungu.

Wengi walio hapa usiku wa leo huenda wakasema, “Unataka kusema ya kwamba utasoma tu kifungu hicho kifupi tu cha maandiko, na ndilo basi?” Loo lakini enyi wapendwa wangu, kuna ya kutosha katika kifungu hiki kidogo cha maandiko kukupeleka mbinguni ama kukuhukumu kwenda kuzimu daima. Msimamo wako kuhusu andiko hili dogo utatia muhuri kikomo chako cha milele, kwa hiyo sasa hebu na tuwazie juu ya andiko hilo kwa muda kidogo.

Kama vile maandiko yakiwa ni machache—kuna mambo mengi madogo tunayoweza kufanya katika maisha haya—bali Yesu alisema kama ukimpa tu mtu kikombe cha maji baridi katika Jina langu, utapata thawabu. Nina furaha sana kwamba Yeye huona mambo madogo tunayofanya. Upendo ni kani iliyo na nguvu, na upendo unapodhihirishwa, na wakati unapofikia mwisho wa nguvu zake, basi neema kuu itachukua nafasi kutoka hapo na itatoa kitu ambacho upendo umeomba. Hiyo ndiyo sababu tunaye Mwokozi usiku wa leo, Mungu aliupenda ulimwengu sana, na upendo wake ulipodhihirishwa kwa ulimwengu ulimtoa Mwokozi. Mungu alitaka sana kukuona

ukiwa mzima hata upendo Wake ultoka ukaenda ukatoa upatanisho kwa ajili ya magonjwa yako pamoja na dhambi zako. Ilikuwa ni upendo wa Mungu uliomshurutisha kufanya hivyo. Hakuna kitu kilicho kikubwa kuliko upendo—unaleta kuaminiana, unaleta imani, unaleta msamaha. Upendo hauna hofu, upendo huondoa woga. Nimekuta woga mwingi sana mionganoni mwa Wakristo—hili si sawa wala haipaswi kuwa hivyo. Woga ni ukosefu wa ujasiri, bali kama unapenda na una ujasiri utatupilia mbali woga. Mungu anakutaka uwe na upendo na ujasiri katika Yeye—hili litatupilia mbali hofu zako na kukufanya umtumikie kwa upendo mkuu zaidi.

Upendo haujawekwa msingi juu ya kanuni za kisheria tunazopaswa kushikilia, upendo hujengwa juu ya imani ya mmoja kwa mwingine, imani katika Mungu, tumaini kwa Mungu, kuwa na ujasiri katika Mungu. Nami nitawaambia jambo hili wapendwa wangu, upendo wa Mungu unapokuja moyoni mwako, hautakwenda huko ukiudhi, ama ukiudhiwa. Unapomwamini Mungu, unapomwamini kweli, na kuolewa Naye, unakufa kwa mambo ya dunia, ndipo Mungu anadhihirisha upendo Wake, na upendo Wake unakufanya vile ulivyo wewe.

Ninataka kuwaambia ushuhuda wa kibinagsi wa baadhi ya matukio yangu yanayohusu upendo; maisha yangu sio ya ajabu kama watu wanavyofikiri, sivyo, ni upendo, hilo ndilo jambo muhimu, ni kumpenda Kristo. Si kusema tu ya kwamba unampenda, bali kutoka katika moyo wako unampenda. Nimeona pepo walio wakatili sana wakishindwa, nimeona wanyama wa mwitu wakijiangusha katika uwepo wa upendo wa Mungu. Upendo hutupilia mbali hofu.

Baadhi yenu hapa usiku huu huenda mkakumbuka usiku ule huko Portland, Oregon, wakati yule mwenda wazimu aliponikabili, na kunitemea mate, na kunilaani. Wachungaji wengi walitimua mbio kutoka jukwaani, walikuwa wanamwogopa. Kulikuwa na wale waliowazia ya kwamba polisi wanapaswa kuitwa, na kwa nguvu wamfunge na kumrudisha gerezani tena. Badala ya kumchukia mtu huyo nilimpenda. Niliwazia, “Maskini mtu huyo hataki kunidhuru—huyo ni ibilisi katika mtu huyo, *yeye* anataka kunidhuru. Mtu huyo labda ana familia, ambayo inampenda, anapenda kula, na kushirikiana, na kuwa mwananchi, bali ni ibilisi ndani yake anayefanya jambo hili.” Nikawazia, “Maskini ndugu huyo!” Alinikaribia na kusema, “Nitakuonyesha kama wewe ni mtu wa Mungu ama la!” Vema, sikusema kitu, nilimwangalia tu. Kila kitu kilinyamaza kimya, ndipo mtu huyo akasema, “Ewe laghai!” Sikusema kitu, bali kumbukeni jambo hili, sikuwa na hofu, kwa maana nilisimama pale kwa upendo wa Mungu, na kukabiliana naye. Ndipo wakati alipokuwa akiinua ngumi yake anipige, nilisema, “Ewe Shetani, mtoke mtu huyo,” ndipo

akazunguka na kuanguka kifudifudi juu ya miguu yangu, akiigandamiza sakafuni. Msiogope wapendwa, pendeni badala yake. Sasa kumbuka, ibilisi atakufanya uthibitishe kwa kila njia madai ya ardhi unayokalia, bali kama unampenda Mungu hakuna hofu iliyosalia, nawe unaweza kusimama juu ya yale unayoamini wala usishindwe.

Ninakumbuka jambo hili: nilipokuwa Mexico mwaka jana iliripotiwa hatungeweza kupata mahali po pote pa kuukalishna umati wa watu, kwa hiyo watu wote waliokuja mikutanoni ilibidi wakutanike kwenye uwanja ulio wazi. Hakukuwako na viti vya kuketi, waliegemeana kusikia neno la Mungu—vijana kwa wazee pamoja, na wale waliochoka sana ambao labda iliwabidi kutembea siku nzima wafike mkutanonii. Nilipowaona wamesimama pale katika baridi niliwazia, “Jinsi kwa kweli wanavyompenda Bwana!” Katika siku ya hukumu jinsi watakavyosimama imara dhidi ya watu wenye kujiita wafuasi wa kanisa ambao hata hawangekaribia mlanga wa mkutano kama huo. Wakati mkutano ulipokuwa karibu kufungwa usikummoja mvua ilianza kunyesha kwa nguvu sana, nasi sote tulikuwa tukilowa maji wakati vurugu kubwa ilipoanza kutukia kwenye umati huo.

Mwanangu Billy Paul alinijia na kusema, “Baba, kuna maskini mama mmoja kule chini katika umati wa watu—mtoto wake mchanga amekufa naye anawasukuma mabawabu wampishe, na kupiga makelele kwa nguvu sana apate kukufikia hata hakuna hata mmoja wetu anayeweza kumzuia.” Nikasema, “Mwambie Ndugu Moore aende akamwombee.” Kwa hayo Ndugu Moore akaelekea kwa maskini mwanamke huyo wa Kimeksiko katika wasikilizaji ambaye kufikia wakati huu alikuwa amewasukuma karibu kufikia mbele. Alipokuwa akielekea kwake niliona ono la mtoto mchanga akifufuka. Maskini mama huyo alikuwa akiniangalia na kupiga makelele, “Padre, Padre!” Nikasema, “Mleteni maskini mtoto huyo mchanga hapa.” Niliona alikuwa hajongei akiwa chini ya blanketi iliyolowa maji. Aliniambia alikuwa amekufa saa nyingi asubuhi na mapema bali hangemwacha kwa madaktari wala mhudumu wa mazishi, bali alimleta kwangu apate kuombewa. Niliweka mikono yangu juu ya maskini mtoto huyo mchanga na kuomba maombi manyenyeketu kwa Mungu, na Mungu akiwa ni shahidi wangu, maskini mtoto huyo mchanga aliangua kilio na kuanza kutupa mateke kwa nguvu alivyoweza. Hilo liliishangaza Mexico nzima.

Upendo wa mama ukidhahirika, neema ya Mungu ikipachukua mahali pake. Amina.

Kesho yake usiku waliniletea mtu mwenye uso wenye makunyanzi ambaye alikuwa ni mzee sana, na nguo zake zilikuwa zimechakaa sana. Alipokuwa akisimama mbele

zangu, alitoa mtungo wa shanga na kuanza kuomba—nikasema, “Ziweke kando ndugu yangu, huna haja nazo sasa.” Loo jinsi nilivyompenda huyo mzee, na kumsikitikia sana—kisha nikaona maskini miguu yake, haina viatu, na suruali yake ilikuwa imechakaa sana. Akiwa na haya yote yamemlemea mtu huyo, nisingeweza kuamini ya kwamba maumbile nayo pia yangemlemea—bali alikuwa kipofu kabisa! Nilipoangalia jambo hili, moyo wangu uliingiwa na mtutumko mkubwa wa upendo na huruma, nami nikamlilia Mungu aliye juu, “Yesu, naomba umrehemu maskini baba huyu mzee kipofu. Je! utakuwa radhi kumsaidia, Baba?” ndipo nikamsikia mtu huyo akipiga makelele, “Utukufu kwa Mungu!” na macho yake yakafunguka kabisa. Ilikuwa ni kitu gani? Ilikuwa ni kuingia katika huo ushirika wa mateso Yake. Huna budi kuingia! Kama wakati wo wote nilipata kufanikiwa katika kumwombea mtu ilikuwa ni wakati ningeweza kuingia katika ushirika pamoja nao, nihisi maradhi yao, nihisi hali zao; ndipo kitu fulani ndani yako kinashuka mbali na hoja na unaomba maombi ya imani kwa ajili ya huyo magonjwa. Huna budi kumhurumia mtu, huna budi kumwonea huruma, huna budi kumsikitikia kabla hujaweza kumsaidia—ndipo unaingia katika namna fulani ya kilindi—ni upendo wa Mungu upitao upendo wa kibinadamu.

Nitawaambia jambo lingine— mnawenza kunihesabu kuwa mshupavu wa dini baada ya hili, bali nitawaambia hata hivyo. Huduma yangu yote imefungwa kwenye upendo—kama ninaweza kupenda, ama nihurumie cho chote kilicho mbele zangu—jambo fulani linatukia! Nilipokuwa bwana nyama miaka michache iliyopita, nilikuwa huko mwituni na mbugani nikifanya kazi yangu wakati nilipokumbuka ya kwamba si mbali na mahali nilipokuwa nikifanya doria kulikuwako na rafiki ambaye alikuwa ni mgonjwa naye alinihitaji. Nikaona ningeenda tu kwa rafiki huyu sasa wakati nikiwa niko karibu hivi, kwa hiyo nikaanza kwenda nikipitia kwenye shamba fulani lililokuwa limezungushiwa ua nikijua hii ilikuwa ndiyo njia ya mkato kabisa. Kwa hiyo nikaficha bunduki yangu chini ya kiti cha gari, nikaruka ua, na kuanza kwenda nikipita shambani nikielekea nyumbani mwa rafiki yangu.

Nilipokuwa kama yadi 200 ama kitu kama hicho kutoka kwenye ua nilimwona fahali mkubwa sana mweusi akisimama mbele yangu. Loo, alitokea wapi? Ndipo nikakumbuka alikuwa fahali mwuaji aliyekuwa ametolewa kutoka kwenye shamba la Burk. Miezi michache tu hapo nyuma alikuwa amemwua mtu, bali kwa kuwa alikuwa ni fahari bora sana wa mbegu walikuwa wamemwuza kwenye shamba hili—nami nilikuwa nimesahau kuwa alikuwa hapa. Huyo hapo amesimama kama yadi 30 tu kutoka kwangu—nilinyosha mkono nichukue bunduki yangu bali haikuwapo, ilikuwa kwenye gari nilikoiacha. Loo ninafuraha niliachaka kule, la sivyo ningalimwua huyo

fahali, kisha niende nikamlipie. Alikwaruza chini kidogo kwa mguu wake kisha akaanza kunijia. Nilijua ua ulikuwa mbali sana, na kitu pekee kilichokuwa karibu nami kilikuwa ni mwaloni mdogo uliodumaa aliokuwa amelala nyuma yake. Loo ningeweza kufanya nini? Haidhuru ningegeukia wapi angenipata—ilikuwa ni mauti! Ndipo nikawazia juu ya Bwana wangu, na ndani ya moyo wangu nilisema, “Nitakiendea kifo changu kwa ujasiri NIWEZAVYO kukiendea, nikintumaini Yesu Kristo.” Mara hilo lilipotoka moyoni mwangu (sasa tafadhalini msilichukue hili kana kwamba ni jambo la kitoto) ndipo jambo fulani lilitukia. Loo laiti lingalitukia sasa hivi! Daima katika matukio haya “hicho kitu fulani” kinatukia. Badala ya kumchukia fahali huyo nilimwonea huruma, nilimpenda, wala sikumwogopa mnyama huyo tena kuliko vile nilivuosimama hapa na ndugu zangu. Hofu yote ilikuwa imeondoka nami nikawazia, “Maskini kiumbe hiki. Niko kwenye eneo lako—wewe ni mnyama wala hujui tofauti yo yote—unajua tu kulinda haki zako.” Ndipo nikamwambia huyo fahali maneno haya kwa sauti kubwa, “Ewe kiumbe cha Mungu, mimi ni mtumishi wa Mungu nami niko njiani kwenda kumwombea ndugu mgonjwa. Ninasikitika nilikusumbua, bali katika Jina la Yesu nenda ukalale chini.” Niliposema hayo alitupa kwato zake mbele ardhini na akasimama. Nilisimama pale nimetulia tu kama nilivyo sasa. Huyo fahali mkubwa mwuaji alikuwa ameacha shambulio lake la kuniua futi tano tu kutoka kwangu. Alipigwa na bumbuwazi sana hata akaangalia huku na huko, kisha akageuka akaenda kule na kulala chini, nami nikapita kama futi tano kutoka kwake wala hakusogea tena. Loo, wakati upendo unapojaribiwa utashinda kila adui na mateso yaliyo duniani. Mungu aliyeifunga vinywa vyasimba kwenye lile tundu angali anaishi leo, ndugu yangu!

Mke wangu, ambaye yuko hapa mahali fulani usiku wa leo, kila wakati alinikemea kwa kukata nyasi uwanjani huku nimevua shati langu. Nina kama nusu ekari ya nyasi mahali ninapoishi, uwanja mkubwa mbele ya nyumba na nyuma pia. Ninapokata nyasi ningepata joto sana kwenye jua kali kwa hiyo ningevua shati langu nikiwa upande wa nyuma wa kiwanja, na kuikata nyasi kwa nguvu zangu zote. Mara mgonjwa angejitokeza nami ningekimbia nyumbani, nibadilishe jinzi na nguo zilizolowa jasho, kisha nikatokea tena katika dakika chache nikiwa katika hali nadhifu zaidi. Vema, hili lingendelea mpaka uwanja wa mbele ungekuwa umemea kabla sijamaliza uwanja wa nyuma kwa kuwa ningeweza kukata tu raundi chache kwa siku.

Alasiri moja yenye joto nilikuwa kwenye uwanja wa nyuma wala hakuna mtu aliyekuwa karibu kuniona kwa hiyo nikavua shati langu na kukata nyasi kwa nguvu na upesi. Nilikuwa nimesahau ya kwamba pembeni mwa ua kulikuwako na

kiota cha mavu, nami nikakigonga kiota hicho kwa mashine ya kukatia nyasi, na wapendwa, Mungu akiwa ndiye hakimu wangu, punde nilikuwa nimefunikwa kila mahali na mavu. Sasa mnajua jinsi mwiba wa mavu ulivyo hatari, unaweza kukuua—nami nilikuwa nimesimama pale bila kucaa shati—ndipo kitu fulani kikatukia! Upendo, hivyo ndivyo ulivyo. Badala ya kuwachukia hao mavu niliwazia, “Maskini enyi viumbe wadogo wa Mungu, sina kitu dhidi yenu. Hayo ni makazi yenu nami niliwasumbua.” Kisha nikawaambia hao mavu kwa sauti kuu, “Samahani sana nilisahau makazi yenu yalikuwa hapo, nami niliwashtua na kuwasumbua—naomba msamaha.” Hilo linasikika ni la kitoto, bali nafikiri ni afadhali sisi tukiwa kama watoto wa Mungu kuliko daima kwenda huku na huko tukijifanya watu wazima tukijichukulia sana mambo mikononi mwetu. Hao mavu walikuwa wamenifunika kila mahali bali sikuwaogopa na ndipo nikasema, “Maskini viumbe wadogo, rudini kwenye kiota chenu, sitawadhuru.” Na kama Mungu aishivyo, hao mavu walinizunguka mara tatu ama nne na wakarudi moja kwa moja kwenye kiota chao. Ilikuwa ni upendo—loo nguvu za upendo wapendwa!

Mara nyingine wakati upendo ulipoonekana ukinisukuma kwa maumbile ulikuwa ni huu: Kwenye msimu wa kiangazi uliopita nilikuwa nimeketi barazani pamoja na marafiki zangu wa thamani Leo na Gene nikiwafundisha neno la Mungu. Tulikuwa tumeingia katika kilindi kwenye somo hili—upendo wa mama. Asubuhi hiyo kwenye gazeti kulikuwako na hadithi ya msichana mrembo wa Kinugro ambaye alikuwa amezaa mwana haramu, naye alikuwa amemchukua akampeleka juu ya daraja la Mto Ohio na kumtumbukiza majini huko amemfungasha kwenye blanketi yake. Dreva wa teksi aliripoti tendo hilo kwa polisi nao wakachunguza na kupata kwamba ni kweli. Tulikuwa tukizungumzia jambo hili jinsi ambavyo mwanamke huyo kweli hakuwa na upendo—yeye alikuwa ni mwanamke aliyezaa mtoto, bali hakika hakuwa mama kamwe.

Mara tukaona oposamu akija kwenye njia yangu ya kuingilia nyumbani. Alikuwa amepita viwanja vingine ambavyo havikuwa vimezungushiwa ua naye akaja hapa kwenye wangu ambao wote ulikuwa umezungushiwa ua, na kana kwamba alijua alikokuja akienda, kwa kuwa hakujaribu kujikokota chini ya ua, alikuja kwenye njia ya kuingilia nyumbani, akageuka akaingia, na kuendelea mpaka mbele ya baraza yangu ya mbele. Nikawaambia hao vijana, “Haikosi ana kichaa cha mbwa ama cho chote kile, kwa kuwa oposamu husafiri usiku tu—ni vigumu kwao kuona mchana.”

Tulitembea kushuka sehemu hiyo ya barabara kumlaki. Nikachukua reki ya shamba ambayo Ndugu Woods alikuwa ameiacha pale juzi yake na nikaiweka juu yake kwa uangalifu. Badala ya kujifanya kama wamekufa kama alivyopaswa

kufanya alianza kuiguguna hiyo reki. Hii ilinishangaza kwa kuwa mara wanapoonaa hatari kidogo tu daima watajifanya wamekuwa—hicho ndicho chanzo cha msemo huo.

Nilimgeuza kumweka kichalichali na nikakuta ya kwamba alikuwa amejeruhiwa sana—alikuwa amevunjika mguu na upande mmoja wa kichwa chake ulikuwa umepondwa kuingia ndani na ulikuwa umeja damu iliyokauka. Nzi walikuwa wamevimbisha kidonda hicho wakisababisha kutokea kwa mabuu, na kilinuka kama nyama iliyooza na kunuka vibaya, kikiwa kimeambukizwa vibaya sana. Alipokuwa amelala kichalichali kitambo kidogo kifuko chake alimowabebeara watoto wake kilifunguka kutokana na udhaifu—misuli yake ilikuwa imechoka sana na kudhoofika asingeweza tena kukifunga. Vitoto vichanga tisa vilikuwa mle ndani, naye alikuwa akivinyonyesha. Loo wazia tu jambo hilo kama inakuja! Kwa pumzi yake ya kufia na nguvu zake alikuwa akiwanyonyesha watoto wake wachanga, na kujaribu kuwalinda. Nikawaambia Leo na Gene, “Hebu angalieni enyi vijana, huyu hapa mama halisi—anatumia pumzi yake ya mwisho kuwapigania watoto wake wachanga, ambapo yule mwanamke mweusi alimtupa wake mtoni. Huu hapa upendo halisi wa mama kwa vitoto vyake.

Loo moyo wangu uliguswa! Papo hapo alijaribu kuamka tena, kwa hiyo nikamwachilia, naye akaanza kupanda ule unjia kuelekea nyumbani kwangu wakati tukiwa tumesimama tukimwangalia. Oposamu huyo alienda moja kwa moja mpaka kwenye vipandio vyangu vya mbele na kuzimia, hakupiga hatua nyingine kamwe. Tulimwendea na wakati huo ndugu na dada Woods wakaja. Dada Woods ambaye mwenyewe ni mganga wa wanyama aliniambia, “Amejeruhiwa vibaya mno asingeweza kuishi kwa hiyo itakubidi umwue Ndugu Branham.” “Loo,” nikasema, “Siwezi!” Naye akasema, “Lakini atakufa na hao watoto wachanga watakuwa kwa njaa.” Akasema, “Vichukue tu vitoto hivyo na uvie upesi.” Akanihakikishia kwamba ingekuwa ni bora kuvuia kuliko kuviacha viteseke—bali loo nisingeweza kufanya jambo hilo. Kwa hiyo akasema, “Vema, nenda kachukue bunduki ukie maskini kitu hiki Ndugu Branham.” Nikasema, “La, siamini hivyo Dada Woods. Nisingeweza kamwe.” Ndipo akasema, “Wewe ni mwindaji, sivyo?” nami nikasema, “Naam, ila mimi si mwuaji.” Kwa hiyo akasema, “Vema mwambie mume wangu afanye hivyo basi.” Lakini kwa kweli sikuona ya kwamba mpango huo ungepaswa kufaulu pia, kwa hiyo nikasema, “Vema, hebu na tungojee kidogo.”

Siku ikaendelea kukatika, na jioni hiyo nikatoka kwenda kutembea pamoa na familia yangu. Tuliporudi nilienda kuona kama ‘posamu huyo alikuwa angali pale. Alikuwa pale kweli, akiwa amekaribia kabisa kufa kuliko hapo awali. Nilijua

ya kwamba kama angalikuwa na nguvu yo yote hata kidogo angeondoka mara giza lilipoingia kwa kuwa hao hutembea usiku—bali alilala pale na vitoto vyake vichanga vingali vilikuwa vikijaribu kunyonya. Loo nilimwonea huruma sana maskini mnyama huyo mdogo aliyejeruhiwa aliylala pale akifa.

Mapema kesho yake asubuhi binti yangu Rebecca alinijia—ilikuwa yapata saa kumi na mbili asubuhi nami ndiyo kwanza niende kwenye chumba changu cha kusomea kumtafakari Bwana. Akasema, “Baba, nisingeweza kumwondoaa maskini yule mama oposamu mawazoni mwangu.” Nikasema, “Wala mimi nami Becky siwezi,” kwa hiyo tukaamua twende tukamwangalie na tuliposimama juu yake pale asubuhi na mapema alionekana na hali mbaya zaidi kuliko hapo awali—kupumua kwake kulikuwa ni kwa pole pole sana hivi kwamba ingekuwa ni vigumu kwako kukusikia. Becky alianza kulia kwa hiyo tukaingia ndani nami nikamrudisha kitandani. Nikarudi kwenye chumba changu cha kusomea na kuketi, nikawazia, “Ee Mungu, jinsi ambavyo maskini huyo mama ‘posamu hana budi anaumwa—jinsi ambavyo hakika anavipenda hivyo vitoto vichanga. Ninatumaini haitanilazimu kumwona akiuawa.” Na nilipokuwa nimeketi pale kitu fulani kikaniambia, “Ulikuwa ukihubiri jana juu yake, ulimtumia kama somo lako.” Nikasema, “Hiyo ni kweli.” “Ulisema alikuwa ni mama halisi.” Nikasema, “Hiyo ni kweli.” “Lakini nilimtuma mlangoni kwako, naye amekaa mlangoni pako kama bibi kwa saa 24 akingojea zamu yake ya kuombewa, wala kamwe hujasema neno.” Nikasema, “Vema, sikuninii...” Nikasema, “Je! ninazungumza na nani? Je! ninajizungumzia?” Niliruka juu na kuwaza, “Loo, hivi huyo ni wewe Mungu?” Nikainamisha kichwa changu na kulia, “Loo Mungu wa rehema, msamehe mtumishi wako mnyenyekevu kwa kutokujua. Ninasikitika Bwana mpenzi kwa kuwa mjinga hivi na kukosa hekima. Nisamehe ninaomba Bwana mpenzi.” Kwa hayo nilienda haraka kwa maskini mama oposamu na nikipiga magoti karibu naye nikainua kichwa changu kwa Mungu katika maombi kwa ajili ya uponyaji wake, nikaweka mkono wangu juu ya mwili wake uliokuwa karibu hauna uhai na nikaomba kwa uchaji. Niliposimama kwa miguu yangu tena uhai ulianza kuingia upya katika mwili wake—akaruka akasimama kwa miguu yake, akavikusanya vitoto vyake vichanga, akaniangalia kana kwamba kusema, “Asante, bwana mwema,” kisha akaanza kuvuka uwanja akielekea kwenye ule unjia. Huyoo akapita kwenye ule unjia, kisha akageuka akaenda moja kwa moja barabarani jinsi alivyokuja na kisha akaingia mwituni! Jinsi nilivyofurahi, loo jinsi nilivyomsifu Mungu! Alikuwa amemwongoza maskini oposamu anayekufa mlangoni kwangu apate kuombewa, naye alikuwa amemfufua

kuwa mzima—mnyama asiye hata na nafsi kwa Roho Mtakatifu kuishi ndani yake—hata hivyo Mungu alimwongoza kwa mkono wake wenyewe nguvu. Kadiri nijuavyo mimi ye ye anaishi leo, na ameilea maskini familia yake.

Kama Mungu, kwa Roho Mtakatifu Wake, angeweza kumwongoza maskini oposamu asiyesema kwangu kwa ajili ya maombi ili maisha yake yapate kuokolewa, wewe ni wa thamani zaidi jinsi gani kuliko oposamu? Je! ninyi pia hamjakuja hapa usiku wa leo kwa ajili ya maombi, ndugu zangu wapendwa? Hakika kama Mungu aliweza kumwinua oposamu, angeweza kukuinua wewe. Loo, hebu na tumtumaini kwa mioyo yetu yote! Ninyi ambaa mmelala hapa mkiwa wagonjwa, hivi hamjui Mfalme wa Wafalme anawaangalia? Msiwe na wasiwasi, msiogope. Unaweza ukasema, “Loo lakini mimi si wa maana sana kwa Mungu,” lakini ninasema jambo hili—wewe ni mtoto Wake na Mungu anakutaka wewe, Anakupenda. Alikupenda sana hata wakati upendo Wake ulipodhihirishwa, neema kuu ilipachukua mahali pake na akamtuma Mwokozi kukukomboa akurudishe Kwake; katika Mwokozi huyu Yeye alijeruhiwa kwa ajili ya makosa yetu kwa sababu alikupenda. Mungu aliona mateso ya watu Wake na kwa mapigo Yake wewe uliponywa—neema ya Mungu ikifanya njia, kwa kuwa upendo Wake ulihitaji jambo hilo. Na wakati upendo Wake ulipodhihirisha hisia Zake, Kristo alitoka akaja kupachukua mahali pake—ilihitaji kitu fulani kupachukua mahali hapo—Upendo Wake peke yake ulikutafuta, ndipo neema ikatoa dhabihu kwa ajili yako. Sasa wewe unaalikwa tu kuamini jambo hilo—“Ye yote amwaminiye asipote, bali awe na uzima wa milele.” Ninatumaini ya kwamba unafuata ono hilo.

Upendo ni mojawapo ya kani zilizo kuu sana kuliko zote katika mpango wa Mungu. Mungu NI upendo, Biblia inasema Yeye ni upendo, na wakati unapokuwa mmoja wa watoto Wake unakuwa ni sehemu ya upendo huo, sehemu ya uchumi wa Mungu, unakuwa raia wa milki Yake. Unapokuwa hivyo unakuwa mwana ama binti wa Mungu, Naye alisema angekupa uzima wa milele.

Sasa neno linalotumiwa kwa uzima wa milele katika Kiyunani ni “zoe,” ambalo linamaanisha uhai wa Mungu; ndipo upendo wa Mungu unapokwingia wewe unakufanya sehemu Yake baada ya wongofu wako—ndipo unakuwa mtoto ambaye “amezaliwa na” ama “anayetoka kwa” na hiyo inakuweka katika uhusiano na Mungu kiasi kwamba wewe sasa ni mwana ama ni binti.

Mungu Muumba aliumba vitu vyote kwa nguvu Zake kupitia Neno Lake lililonenwa, na hiyo ni kusema kila kitu ni Neno la Mungu lililodhihirishwa. Ulimwengu mzima uliumbwa

Naye, na jinsi tunavyokosea tunapajaribu kulipuuza Neno la Mungu, ama kujaribu kuwekea nguvu za Mungu mpaka kwa mawazo yetu wenyewe. Dunia yenyewe tunayosimama juu yake usiku wa leo ni Neno tu la Mungu lilodhiihirishwa—Mungu aliufanya ulimwengu kwa Neno Lake lililonenwa. Loo jamani !

Kwa nini umekuja hapa usiku huu kuombewa? Nafsi yako inasimama wapi na Mungu ndilo swalı langu? Hebu na tuinamishe vichwa vyetu sasa na tuzungumze Nay... na kumbukeni enyi marafiki wapendwa, kama huu ulikuwa uwe ndio ujumbe wa mwisho niliopata kuhubiri, neno langu ni kweli, kwa maana Biblia inasema kwamba ni kweli, Roho Mtakatifu akitenda kazi katika huduma yangu anathibitisha jambo hilo kwamba ni kweli, na ulimwengu wa sayansi unajua ni kweli kwa kuwa imepigwa picha dhahuri. Aminimi na mmwone Mungu akitenda kazi mionganı mwenu... Kwa kuwa ninaamini ya kwamba nuru iliyoko sasa wakati ninapowaombea, ni ile ile ambayo ilipigwa picha mkutanoni huko Houston, Texas. Pia ninaamini—mbele za Mungu Muumba na Mwokozi wangu—ya kwamba ni nguzo ile ile ya nuru iliyowaongoza wana wa Israeli na Musa akiwa kiongozi wao. Ninaamini ya kwamba ile nguzo ya moto iliyopo hapa sasa, na itakayofunua siri za miyo ya watu hapa usiku wa leo, ni nguzo ile ile ya moto iliyoshuka na kufanyika mwili na kukaa kwetu katika mfano wa mwana wa Mungu, Yesu Kristo. Yesu alisema, “Nilitoka kwa Mungu, na ninarudi kwa Mungu,” na ninaamini wakati aliporudi kwa Mungu alirudi katika umbo la nuru hii, umbo lile lile alilomtokea nalo Musa na kwa manabii hao wengine kote katika Biblia. Ninaamini kwamba ni nuru ile ile ambayo Paulo aliona akienda zake Dameski, hata ingawa wale waliokuwa pamoja naye hawakuona kitu. Ninaamini nuru iliyoko hapa karibu na mimi sasa ni ile ile iliyomwongoza Petero kutoka gerezani.

Yeye yuko hapa sasa hivi akijibu maombi kwa maskini mwanamke mmoja anayeketi papa hapa, yeye ni maskini mwanamke mwenye nywele nyeusi ambaye anaugua ugonjwa wa neva. Mtu anayeketi karibu yake anaumwa na mgongo—ninyi ni mume na mke—inueni mikono yenu kama hiyo ni kweli. Siwajui wala sjapata kuwaona, bali Bwana Yesu Kristo anakuponya. Nyote wawili mmeponywa. Amina.

Ninaona nuru sasa ikimwendea mtu aliye na ugonjwa wa kibofu nyongo. Bwana, jina lako ni Clarence, nawe umetoka mahali panapoitwa Grand Prairie. Hiyo ni kweli, sivyo? Vema, shida yako ya kibofu nyongo imekwisha, bwana. Unaweza kwenda nyumbani na uwe mzima. Amina.

Unasema, “Ndugu Branham, uliliita jina la mtu huyo.” Je! Yesu Kristo alipokuwa hapa katika mwili wa nyama

hakumwambia Simoni ya kwamba jina lake lilikuwa ni Simoni, na kwamba jina la baba yake lilikuwa ni Yona, na ya kwamba angeitwa Petro tangu wakati huo? Kweli! Yeye angali ni yeye yule. Amina.

Hiyo Nguzo ya moto iko sasa juu ya mwanamke anayeugua shinikizo la damu la juu. Jina lako ni Bibi Fishbrook, nawe umetokea humu mjini, unaishi katika barabara inayoitwa Barabara ya 125, namba ya nyumba yako ni 13104. Kama hilo ni kweli, inua mkono wako. Vema, nenda nyumbani, umeponywa, bibi. Yesu Kristo anakuponya.

Loo ninawapa changamoto enyi watu kuamini. Mtazameni Mungu, mpate kuishi, na mwamini! Ile nuru sasa inashuka chini hapa juu ya bibi huyu katika safu ya mbele—Binti Pharr—una ugonjwa wa moyo, sivyo? Je! unaamini Mungu atakuponya? Baba yako aliye karibu na wewe ana shida za kiroho. Hutoki kwenye mji huu, umetoka Marekani, kutoka mahali palipo na vilima. Ni Warren, Pennsylvania. Kama hiyo ni kweli, inua mkono wako. Mmeponywa sasa, nyote wawili. Yesu Kristo anawaponya. Amina.

Nitafanya jambo fulani sasa. Kila mtu ambaye amekuwa baridi miyoni mwao kwa Bwana Yesu Kristo, wote walio mbali na ushindi usiku wa leo, wenye dhambi wote, njoni sasa kwa Kristo ambaye sasa hivi amejithibitisha Mwenyewe kwenu. Njoni sasa kwa Bwana Yesu wote wanaotaka kuondoa madoa yao ya hatia...Kristo yupo hapa! Njoni mbele sasa wakati Yeye akiwa yupo hapa. Mtafanya jambo hilo? Njoo rafiki mwenye dhambi, uliyerudi nyuma, baridi, vuguvugu, asiyejali; njoni kutoka kwenye roshani, tunawapa nafasi hii mje sasa na umkubali huyu Bwana Yesu ambaye anatoa mwiba kutoka katika mauti. Hakika ninajua ninalozungumzia. Yeye asingeniruhusu nifanye mambo haya kuthibitisha ya kwamba Yeye yupo hapa. Je! unataka kutupilia mbali madoa yako ya hatia? Njoo moja kwa moja sasa, kila mmoja.

Mna nini ninyi Wakanada? Mna nini? Ni jambo zuri kutopenda mabadiliko, bali msiwe wagumu kupita kiasi. Mtamhuzunisha Roho awaache, nanyi hamtakuwa na uamsho. Nisikilizeni mimi. Ninanena katika Jina la Bwana! Vunjeni ukaidi huo, na huo ugumu mionganoni mwenu; shukeni magotini; mnajua mnahitaji kutubu. Ninanena katika jina la Yesu Kristo! Kama mkitaka kuwa na uufufuo, ipasheni moto miyo yenu kwa Mungu. Mimi ni mtumishi wa Mungu, nabii wa Mungu, na kuna wale mionganoni mwenu hapa usiku wa leo wanaohitaji kuwa hapa kwenye madhabahu hii. Afadhalii mjiweke sawa na Mungu kwa kuwa saa inakuja wakati mtakapopiga makelele kusudi mpate hili wala hamtalipata. Hilo ni “Bwana asema hivi!”

Huyo ni Mungu akinena. Shikeni njia mje madhabahuni, ninyi ambao hamjali—oneni aibu! Wakati Roho Mtakatifu atakuja na kufanya mambo haya anayofanya moja kwa moja mionganoni mwenu—nanyi mnaketi hapa kana kwamba mmelegantia hata kufa! Tokeni kwenye viti vyenu mje madhabahuni. Tubuni la sivyo mtaangamia! Sijui ni kwa nini ninasema jambo hili, bali kitu fulani kinaniambia niliseme. Ninawapa onyo, hili huenda likawa ndilo lenu la mwisho pia! Tubuni! Sijali ninyi ni wa kanisa gani—kama hamjatubu na kumpenda Mungu hakumo ndani ya mioyo yenu, ninyi ni wenyewe dhambi na mko njiani kwenda Kuzimu! Hiyo ni “Bwana asema hivi.”

Mungu yule yule anayetambua roho hapa na kuwaambia hali yao, ananena sasa hivi. Ninanena katika Jina la Yesu Kristo. Kimbiensi mbio mwende madhabahuni, tubuni upesi kabla Mungu hajawafungia ukurasa, na mkaangamia milele! Hilo ni “Roho Mtakatifu asema hivi,” aliye katikati yetu sasa!

Hilo ni wazi bila kuficha kabisa, bali huyo ni Yeye—ninaweza tu kulizungumza. Mungu anajua nisingesema mambo haya mimi mwenyewe kwa cho chote kile. Kitu fulani kilinishika ghafla na kusema niseme hivyo. Mimi ninamtii Mungu peke yake. Tunapoimba ubeti mmoja zaidi wa Damu Imebubujika, afadhali uje. Loo jinsi nchi hii inavyohitaji kuvunjika, hamna budi kupata kuvunjika kabla hamjafinyangwa tena. Mmeenda tu kanisani kwa muda mrefu sana hata mmefunikwa na kuvumwani na mkakaushwa na kitu hicho. Mnahitaji toba, mnahitaji tukio la mtindo wa kale la upendo wa Mungu moyoni mwenu. Nanyi kumbukeni—sauti yangu itawafuatilia mradi tu mnaishi! Hiyo ni kweli! Ninanena katika Jina la Yesu Kristo. Amina.

Hebu niseme jambo lingine: kama una jambo fulani juu ya mtu ye yote, afadhali ulisahihishe, sasa hivi! Kunakuwa na giza kwenye jengo hili. “Roho yangu haitashindana na mwanadamu daima!” Ninaamini ningesimama kutoka kwenye kiti changu na nije kama moyo wangu haukuwa tu na joto la Mungu—ningekuja madhabahuni.

Wapendwa, siaona jambo hili likitendeka kwa miaka kadha. Kamwe sijapata kuwa na hisi kama hiyo ambayo ilinijia muda mchache tu uliopita. Nilipoona kukionekana kama weusi ukiingia katika jengo hili, kitu fulani kilinigusa, na hayo hayakuwa ni maneno yangu, wala mapenzi yangu kwa ajili ya maneno yangu. Mungu anajua jambo hilo ni kweli.

Kuna kitu Fulani kasoro, kumbukeni tu jambo hilo. Sikilizeni, enyi marafiki, mimi si mtu wa kupatana, wala mtu asiye na msimamo. Ninawaambia kweli, na Mungu anathibitisha ya kwamba ninasema kweli. Mnakuwa tu wa “kikanisa” sana hata mnamwacha Kristo nje! Nina furaha

sana kuona imani yenu, na madhabahu hii imejazwa na mioyo miaminifu—inaonyesha Mungu anatenda kazi. Sasa sisi sote kwa pamoja, na tuombe na kumwita Bwana wetu wakati atatusikia. Mungu ataipa Edmonton ufuluo kama mtatii...njoni na tumsihi Mungu. Na kumbukeni jambo hili, tunahitaji ufuluo, wala damu yenu haiko juu yangu kwenye siku ya hukumu. Ninanena katika jina la Yesu! Je! mngetaka kuona usiku mwagine wa Pentekoste? Ni juu yenu. Mpaji wa Pentekoste yupo hapa—Roho Mtakatifu. Ombeni, mwiteni Mungu!

Loo, Mungu wa milele, ninakuja katika jina la Yesu Kristo. Sasa ibilisi amekwisha kemewa, magonjwa yameponywa, injili imehubiriwa, na nguvu za Mungu zimetoa kila nguvu za ibilisi kutoka katika jengo hili la maonyesho. Ee Bwana, bomoa kila kiambaza cha kati kilichotutenga, vunjilia mbali umadhehebu, vunjilia mbali fikara potofu za namna hiyo, na uache Roho Mtakatifu aje sasa hivi kwenye kila moyo kama upepo wa nguvu ukienda kasi. Wajaze wasikilizaji hawa wengi mno hapa na nguvu za mwanga wa Roho Mtakatifu, washa mwali wa moto katika kila moyo. Ee, Mungu wa milele, ujuaye mioyo ya watu, ujifunuaye mwenyewe kama moto uwakao, samehe kila dhambi, ondoa makosa, na uwafanye watu hawa kuwa wasafi na weupe. Tujalie, Bwana. Jina la Bwana libarikiwe. Inueni mikono yenu enyi watu, mpeni sifa...mpeni sifa!

MLANGO WA 2

PANDENI JUU TENA

Ningetaka kushiriki pamoja nanyi enyi wasomaji wapendwa mihtasari michache nilioandika hapa mara kwa mara kuhusu matukio yaliyo muhimu sana katika huduma ya William Branham

Kama nyote mjuavyo bila shaka Ndugu Branham alikuwa asafiri kwenda katika nchi za ng'ambo katika ziara ya miezi minne kuizunguka dunia. Habari zilipokelewa ya kwamba makanisa nchini na maafisa wa serikali walikaribisha jambo hili kwa moyo. Uholanzi, Ujerumani, na Uswisi walitayarisha majumba ya mikutano yaliyoweza kueneea watu 25,000 yapate kuuchukua umati wa watu waliokuwa wakijiandaa kuhudhuria. Serikali ya utawala wa kifalme ya Ireland ilikuwa inatuma kamiti kutoka kwenye ikulu yake wakamkaribishe.

Kwa mtu wa kawaida hakuna mipango mingine wala matayarisho yangaliweza kuwa bora zaidi, hakuna nafasi ingalikuwa kubwa namna hiyo, bali Ndugu Branham anafanya yale tu Mungu anayomwongoza na Bwana alimtahadharisha asiende kwenye wakati huu. Mungu alimfunulia mawingu meusi yaliyokuwa juu ya miji aliyokuwa amepanga kuizuru. Kwa kweli lilikuwa ni jambo gumu kwake kuwaambia marafiki wake wapendwa asingeweza kwenda. Ilikuwa ni vigumu zaidi kwake kuwaambia watu wa Mungu walio wahitaji asingeweza kwenda. Hata hivyo aliwaambia na alipowaambia akarudi nyumbani. Bali alirudi nyumbani kwa namna fulani amehuzunika kwa kuwa moyo wake ulikuwa ni mzito. Alijisikia wengi wasingeilewa, wengi wangeumia na kuvunjika moyo, na jambo hili ndilo lililomsumbuwa sana. Lakini Ndugu yetu mpendwa Branham anajua, juu ya dunia na mbingu nzima, falme na mamlaka, vyo vyote zilivyo, ya kwamba njia ya Mungu ndiyo bora iliyo kabisa na kile Mungu asemacho ndicho neno la mwisho. Bila kujali mwanadamu angewazia nini ama angesema yeye hana budi kumtii Mungu.

Ni neema ya jinsi gani kutulia katika maneno haya machache :

Kutokuamini kizembe hakika kutakosea
Na kuchunguza njia Yake bure;
Mungu ndiye anayejifasiria
Naye atalifanya dhahiri.

Hata wakati uwe ni wa kuvunja moyo jinsi gani, ama wakati uwe ni wagiza jinsi gani, hakuna mtu ajuaye hasa ni wakati gani Mungu atatokea na yote yabadilike. Na ndivyo ilivyokuwa hapa. Katika siku chache simu ilimfikia Ndugu Branham. Ilikuwa ni ya rafiki yake mwema Ndugu Sothman wa Kanada ambaye alifikiri ya kwamba mukutano huko Tacoma ungekuwa sawa. Baadaye siku hiyo Kasisi A.W. Rasmussen, mchungaji wa Hekalu la Betheli la Tacoma, alimpigia simu Ndugu Branham na alishawishika kabisa kwenye moyo wake ya kwamba angemwalika Ndugu Branham wakati huu aje huko Tacoma kufanya mukutano.

Hawa hapa watu wawili waaminifu wa Mungu, mmoja akisihi na huyo mwagine akialika! Lakini kama kawaida Mungu ndiye "mpaji!" Kwa hiyo hana budi kunena! Kwa kuwa Ndugu Branham angaliweza kuwaambia nini baada ya kuwaambia maelfu kote ulimwenguni "la" na kisha aseme "ndiyo" kwa watu wachache hivi? Angeweza kusema nini na asionyeshe upendeleo, chini ya uwezo wake? Hana hata neno moja. Bali wakati moyo mwaminifu wa uadilifu unapohitaji jibu Mungu analo hilo. Ni ajabu jinsi gani, ni kuu jinsi gani, ni kama Mungu jinsi gani kunena—hebu sikiliza maneno Yake anapomzungumzia Ndugu Branham:

"Panda Uende Huko Tena, huko Tacoma." Maneno sita madogo—ni machache jinsi gani kwa kuzungumzwa na Mungu, Yeye aliyenena ulimwengu ukawa. Mafupi sana na dhahiri sana. Bila maagizo, bila kutaja mafanikio, hakuna maneno ya mwongozo, hakuna picha—maneno sita tu yaliyonenwa kwa urahisi. Mtu angefikiri ya kwamba Mungu angeielezea safari yote kwa urefu kikamilifu. Lakini kwa kila agizo, haidhuru limenenwa kwa urahisi jinsi gani, Mungu hutoa wingi wa imani ambamo humo mtumishi atatoa uvuvio. Na hazina ya nguvu zisizo na kipimo ambazo kwazo, kwa jina Lake, sisi kwa upande wetu tunaweza kutoa mengi mno toka humo. Mungu anapozungumza kwa njia hii linaonekana dhahiri sana kwangu hivi kwamba kwa imani tutadhirisha mpango wa Mungu tunapoenda—hatua kwa hatua. Mungu atafanya mpango Wake wote dhahiri kama maneno Yake yaliyonenwa wakati sisi nasi kwa upande wetu tutakopomwamini na kutenda kwa imani rahisi.

Tacoma, kwa kuomba bila kukoma na kufunga mara nyingi, walisiwa na Mungu. Alikuwa akimtuma mtumishi Wake kuwahuisha katika Roho, kuwaponya wagonjwa wao, na kuongeza kwenye kanisa, mwili Wake, kwa kuwa Yeye angeweza tu kufanya hivyo kwa kupitia mdomo wa mtumishi Wake.

Nilifurahishwa sana na Roho wa kupendeza wa Kristo mionganoni mwa watakatifu wa Tacoma na wengineo ambaa

walikuwa wamekuwa kutoka miji mbalimbali kuungana na mkutano huu mkuu. Mimi nilikuwa kwenye mkutano kila siku kutoka saa 7 hadi saa 4:30 usiku. Niliketi kwenye kibanda cha kuuzia vitabu nyuma ya hilo jengo. Kwa saa 9½ kila siku nilizungumza na kufanya ushirika na watu waliokusanyika, na kuyajibu maswali yao. Hakuna hata mmoja wao asiyekuwa mwema wala mwenye haki. Kila mmoja wao alioneckana mpole sana na mwema, mwenye furaha, na amani. Mkutano wote ulikuwa ni muungano wa imani na umoja katika Roho. Hakuna mmoja aliyeoneckana kuwa mbin afsi, bali alimjali ndugu yake. Hakukuwako na shuhuda za mafundisho ya ishara za ajabu ama matendo ya uongo. Kwa kweli Mungu alishuka kukaa katika mkutano. Ulikuwa ni mkutano wa kuwaunganisha watu sana niliopata kuhudhuria.

Matunda ya Roho yalionekana wazi, na karama za Roho zilikuwa zikitenda kazi mionganoni mwa kusanyiko—unabii, lugha, na kufasiri, uponyaji, na miujiza. Je! nithubutu kusema ewe msomaji mpendwa ni mangapi nimesikia katika miaka minne iliyopita katika mikutano inayoendelea? Nimesikia na kuona madhihirisho mengi kama hayo kupitia kwa wana na binti za Mungu katika sehemu mbalimbali katika nyakati mbalimbali. Bali kamwe sijazona zikipokewa kwa uchaji kama huo na heshima na kicho kitakatifu kama nabii hizi na lugha pamoja na kufasiriwa kwake. Loo kile kina, huo upendo, utimilifu wakati Mungu kweli anaponena mionganoni mwa watu Wake. Ni shauku yangu kushiriki pamoja nanyi unabii wa ajabu sana.

Ndugu Branham alikuwa ndiyo kwanza amalize kuhubiri somo la “Tungetaka Kumwona Yesu,” na wasikilizaji walikuwa katika kimya kikuu—hasha, hakuna hata mmoja aliyejongea, wala nong’onezo kusikika. Wakati Mungu yuko karibu na kunena Yeye huita ukimya mtakatifu! Hata Ndugu Branham ambaye alikuwa akizungumza kwa sauti ndogo alinyamaza kwa ghafla! Ndipo mara moja sauti ilisikika kutoka roshani ya mbali. Hapakuwapo na haja ya maikrofoni kwa kuwa ilionekana kana kwamba Mungu alifungua kila sikio! Mawimbi ya hewa yaliyapeleka dhahiri kwenye kila sikio na moyo kwa wote waliokuwako. Hebu niyanukuu kwa usahihi—neno kwa neno kama yalivyorekodiwa kwenye kinasasauti changu:

“Naam Bwana asema kwa watu hawa wangu, ya kwamba mtumishi wangu ambaye nimemtuma, kuja kwenu, hata kwa ajili ya kizazi hiki, hana budi kunena kwa ujasiri kama vile Paulo, kuwathibitishia hawa ya kwamba nimemtuma.

“Naam kwa kuwa nimemtuma mtumishi wangu Branham. Nimeweka maneno Yangu kinywani mwake. Kama

vile nilivyomtuma Mwanangu kuja kufa, na watu wangu wakamkataa—vivyo hivyo nimemtuma mwanangu Branham, hata katika siku yenu hii—amekuja kwa watu hawa.

“Naam wamekusanyika pamoja, wamekutana katika vyumba vyao vya siri. Viongozi wa watu wangu wamefanya shauri pamoja. Wamepitisha hukumu juu yake. Wamesema katika vyumba vyao vya siri—‘Tutamkataa—tutamtafutia kosa. Tutampata na makosa mengi, nasi tutawafundisha watu wetu. Tutawaambia ya kwamba huyu pia ni Beelzebuli. Naam, hakutumwa na Roho wa Bwana.’

“Kwa hiyo nitawahukumu kwa mtumishi wangu Branham ambaye nimemtuma kwenu.

“Kwa kuwa nitaweka Roho yangu katika watumishi wangu na kama hamtamsikia Roho wangu mtaangamizwa. Bali kama akikushukia, kama Neno la Bwana litakuangukia, utasagwasagwa, na nyumba yako itaachwa ukiwa. Huu ndio ule mwamba, naam kama wewe utaanguka juu yake utasagwasagwa. Bali ukikuangukia utakusaga uwe vumbi.

“Na Bwana asema hivi kwa hao waliokusanyika pamoja, Bwana asema hivi kwa hao wanaojiita kwa wale waliojazwa na Roho wangu: Kwa kuwa mmekuwa watu wangu—nimewabariki. Nimewatia mafuta, bali mmekusanyika pamoja na mmekataa mtumishi wa Bwana Mungu ambaye nimewatumia. Na hata kwa kumtuma nitawahukumu, na nyumba yenu itakuwa ukiwa—hata leo, na katika wakati huu. Kwa kuwa mtaomba mpate ufufuo bali sikio la Bwana halitawasikiliza, kwa kuwa nilipowaita hamkunijua. Mngekuwa watu wageni kwangu wakati ningenenana nanyi. Naam ninyi mmekuwa kama watu wangu niliposimama na kutoa pepo, na kuwaponya wagonjwa, na kuvunja mikate na kuizidisha machoni mwenu, ninyi mlisema, ‘yeye ana pepo.’

“Bali yeye aliye na sikio na asikie yale Roho ayaambia makanisa, kwa kuwa nitasema nanyi. Nitawatuma watumishi wangu kwenu nao watawabariki nanyi mtakusanyika kwangu. Mtabarikiwa sana jinsi ambavyo hamjapata kubarikiwa. Yatupilieni mbali mawazo ya wanadamu na njia za wanadamu na mumgeukie Bwana.”

Unabii huu wenyewe! Na kwenye wakati huu nitaacha uchambuzi uwe ni wako. Mungu akizungumza kwa unabii kwetu, akituonya nina hakika, juu ya hatari iliyopo pamoja na hatari iliyo mbele.

Sasa hebu niwaambieni ujumbe wa Mungu kwa karama nyingine tena—kunena kwa lugha na tafasiri.

Nilipokuja Tacoma nilikuta mioto mingi ingali ikiwaka kutokana na mukutano wa mwisho—mioto ya ushindi ikiwaka kumtukuza Mungu katika vyombo vya udongo. Kimoja cha

vyombo hivyo ninachonena habari zake kilikuwa ni Bibi John Lewin, Barabara 1313 ya Hood, Aberdeen, Washington. Alinisimulia hadithi hii, na katika maneno yake mwenyewe ni kama ifuatavyo:

“Katika msimu wa kiangazi wa 1946 nilinenepa sana hata rafiki zangu na watu ninaofahamiana nao walifikiri nitapata mtoto tena. Ndipo basi nilikwenda kwa daktari wetu. Hakusema kitu. Yapata majuma mawili baadaye nilipatwa na hemoraji ya kutisha. Nilirudi kwa daktari huyo na uchunguzi wake ulionyesha uvimbe mkubwa. Mara moja mimi pamoja na watakatifu tulioomba bali niliendelea kunenepa na kuwa na hali mbaya zaidi. Hatimaye daktari akaniambia nilikuwa na “kansa ya kufisha,” na mwili wangu ulikuwa umeliwa vibaya.

“Rafiki mmoja alinizungumzia juu ya Ndugu Branham ambaye alikuwa anakuja Portland, Oregon. Tuliomba kwa kudhikika ili Mungu afanye njia ya mimi kwenda, Naye akaifanya. Niliombewa alasiri. Ndugu Branham aliniambia nilikuwa na kansa na akasema, ‘Katika saa 72 hii utaitoa kwa haja kubwa.’ Nikawa mgonjwa kesho yake kwenye ibada. Nilipoingia chumbani mwangu nikawa mgonjwa zaidi. Basi nilinya hiyo kansa wakati huo na nilipofanya hivyo harufu yake ilikuwa kwa kweli haivumiliki.

“Tumbo langu lilibaki kuwa kubwa kwa miezi mingi. Ndipo asubuhi moja likawa la kawaida kama liwezavyo kuwa. Nilikwenda kwa daktari miezi michache iliyopita nipaye kuchunguzwa naye akatoa taarifa ya kwamba hakukuweko na alama ya kansa kabisa mwilini mwangu. Leo nimepona! Imekuwa ni miaka kumi na moja tangu nilipoombewa. Ninashukuru sana kwa ajili ya uponyaji wangu, na kwa upendo wa Ndugu Branham na uaminifu wake kuwa mtumishi wa kweli wa Mungu.”

Jambo moja ambalo ushuhuda wa Bibi Lewin unatuelimisha ni jinsi ambavyo uponyaji wake ulivyonotukia. Kama ungalikuwa ni mwujiza angaliponywa mara moja, bali uponyaji wake ulichukua kipindi cha wakati. Kweli aliitoa kansa kwa njia ya haja katika saa 72, bali kuponywa kwa tishu zilizoathirika na kujengwa upya kwa seli kulikuwa ni tukio la pole-pole. Hata hivyo mtu angeweza kusema ulikuwa ni mwujiza kwa maombi yo yote yanayokomesha mauti na kusababisha uhai tena si kitu pungufu ya muujiza. Hata hivyo ninaamini ya kwamba mwujiza ni dhihirisho linalojitangaza papo hapo, ambapo uponyaji ni tukio la polepole la kujenga upya seli za mwili katika kipindi cha wakati. Sasa tunajua mwujiza ni uumbaji na kurudishwa mara moja kwa seli zilizokufa na tishu za mwili. Nitaelezea kwa mfano ninalomaanisha. Inahusu mvulana mmoja mdogo wa Kihindi mwenye umri wa miaka tisa. Jina lake ni Toni James, Njia ya 1, Sanduku 326, Shelton, Washington.

Maskini Toni James alikuja mkutanoni akiwa kipofu kabisa. Hii ilikuwa ndiyo hali yake tangu alipokuwa na umri wa miezi minane na wakati alipoanguka kutoka kwenye kitanda chake cha mtoto na donge la damu likatunga ndani ya macho yote mawili kutokana na huko kuanguka. Baadaye tishu za kovu zilikua na hatimaye baada ya majaribio mengi madaktari walimkatia tamaa kabisa na kumwambia mama yake Toni, "Mwanaao kamwe hataona tena! Mchukue umpeleke mvulana wako nyumbani kwa maana hana matumaini." Daktari pia alimwambia ya kwamba kile tu atakachoweza kuona ni kivuli cha nuru kutoka kwenye jicho moja, hilo lingine lilikuwa limeharibika kabisa.

Kwenye umri wa miaka sita Toni aliingia kwenye Shule ya Jimbo la Washington ya Vipofu. Kwenye wakati huo huo baba yake Toni alisikia juu ya nabii katika kizazi hiki chetu ambaye jina lake lilikuwa ni William Branham. Alisikia juu ya kuponya kwingi na miujiza ambayo Mungu alikuwa amefanya kwa mikono ya mtu huyu. Tumaini lilichipuka katika moyo wa huyu baba aliposikia taarifa hizi za habari njema. Wakati ulipozidi kusonga mbele babake Toni alivuvumkwa na heshima ya kilindi na kumpenda nabii huyu ambaye hajawahi kumwona kamwe. Alikaribisha taarifa zote kumhusu yeye na imani yake ikakua na vivyo hivyo imani ya Toni. Wote wawili waliamini ya kwamba siku moja Mungu angempa kuona.

Wakati habari ilipomfikia baba yake Toni ya kwamba Ndugu Branham alikuwa anakuja Tacoma aliyakinia moyoni mwake kuwa wa kwanza kufika kule. Na Jumatano jioni, usiku wa kwanza ambao mkutano mkuu ulianza, walikuwapo Bw. James na mwanawe kipofu, wa kwanza hapo kwenye safu za kwanza. Kila kitu walichokuwa wamesikia kumhusu Kasisi Branham kilikuwa ni kweli. Sasa kilikuwa ni kweli iliyo hai mbele za macho yao. Huku miyo yao imejawa na furaha walirudi upesi nyumbani wakiwa na habari njema ya yale waliyokuwa wameshuhudia.

Alhamisi usiku Toni na baba yake walikuwa tena mionganoni mwa wa kwanza kufika kule. Usiku huu walimleta mama yake Toni na bibi yake. Wakati ulipowadia wa kuwahudumia wagonjwa kila mtu alikuwa mtulivu kabisa. Mnamo sekunde chache Ndugu Branham alianza kuwaita watu kutoka kwa wasikilizaji-loo, wengi sana waliipta, na wengi zaidi, kwa kuwa imani ilikuwa ina nguvu nyingi mionganoni mwa watu. Hatimaye macho ya Ndg. Branham yakamwangukia Toni. Ukimya mkuu ukashuka. Ndipo akimwangalia mama yake Toni moja kwa moja alisema, "Mlete mwanaao kipofu kwangu." Kwa haraka Bibi James akamleta Toni jukwaani. Ndipo akisimama mbele ya Ndugu Branham alimtoa mwanawe kwenye mikono

ya nabii! Ndugu Branham kwa uangalifu alimshika huyo mvulana mikononi mwake akimkumbatia kifuani mwake na akaomba kwa uchaji mkuu.

Mara, katika kufumba na kufumbua kwa jicho la Toni, kuona kwake kulirejeshwa, na maskini Toni akamwona nabii wa Mungu kwa kizazi hiki kwa macho yake mwenyewe. Ndugu Branham alisimama basi na akazungumza na mama huyo, akisema, "Unateseka na maumivu wala madaktari hawawezi kukusaidia—wewe pia umeponywa." Kisha akamgeukia baba yake Toni na kusema, "Bwana, wewe pia umeponywa." Bado akigeuka tena alisimama kwa bibi yake Toni na kusema, "Imani yako imekuponya pia."

Kwenye wakati huu umati wa watu ulitikiswa chini ya nguvu za Mungu. Watu walikuwa wakishangilia, na kulia, na kumsifu Mungu. Ndipo nguvu za uponyaji za Mungu zikashuka juu ya watu katika mawimbi makuu. Mimi nilisimama nyuma ya jengo, machozi yakinirika usoni mwangu. Nilikumbuka mimi mwenyewe nikisema, "Bwana mpenzi, Bwana mpenzi, si ajabu imeandikwa 'mtoto mdogo atawaongoza' . . .

Kutoka upofu kufikia kuona kukamilifu—mwujiza hakika. Lakini hata jambo hili likuwa na tashwishi ya mwenye kushuku. Rafiki msiri wa Bibi James alimjia na kusema, "Haiwezekani kuwa hivyo, mlipanga jambo hili kabla." Bibi James alimkemea rafiki yake vikali na kusema, "Yaangalie macho ya mwanangu." Wakati huyo rafiki mwenye kushuku alipoyaangalia macho ya Toni aliona asingeweza kukana yale ambayo Mungu alikuwa amefanya, ndipo akaondoka akaenda zake. Jioni hiyo Bibi James akienda zake nyumbani aliyaruidia matukio ya usiku huo moyoni mwake. Asingeweza kuwazia kwamba yote yalikuwa yametendeka. Kwa namna fulani alianza kutilia shaka na ndipo Mungu akanena kwenye moyo wake na kusema, "Usitilie shaka la sivyo uponyaji huo utapotea, bali amini." Kesho yake jioni tafsiri hii ikatukia na Bibi James kweli alijua umuhimu wake:

"Tazama Roho wa Bwana asema kwa watu hawa—

Je! Mimi sijaahidi kuwa pamoja nanyi hata ukamilifu wa dahari? Hivi sijawaahidi ya kwamba nitathibitisha neno langu kwa ishara na maajabu yakifuatana na huduma? Naam ninawaambia watu wangu kama mtaiinua miyo yenu na mwamini tu kwa kuwa ahadi Yangu ni kwa ajili yenu nanyi mtauona utukufu wa yale niliyowaahidi tangu kuwekwa misingi ya ulimwengu. Roho Yangu ndiyo itakayoenda na kufanya zile kazi ambazo Baba ameamuru zifanywe. Naam nasema watu wangu, niangalieni mpate kuokolewa. Nasema watu wangu, niangalieni mpate kuponywa."

Enyi wapendwa, tafsiri hii ilikuwa na nguvu sana hata watakatifu walikuwako walikuwa wakiopokea kwa utulivu

wa utakatifu. Loo nguvu kwa miyo yetu michovu Mungu anaponena. Nina furaha sana Yeye alisema maneno hayo—kwa maana imani yetu kweli katika nguvu Zake zote ni dhaifu, na nguvu zetu ni dhaifu. Aa bali ni neema Yake itakayostahimili jaribio.

Watu wengi basi walijua Mungu alikuwa amenena, na ya kwamba wote wanapaswa kuamini. Bibi James alikuwa mionganoni mwa hawa waliojua ya kwamba kuamini kulikuwa ni jambo ambalo Mungu alihitaji.

Hivyo basi baraka za ajabu za Mungu zilimwagika tena katika Tacoma. Laiti tungalikuwa na nabii tupate kumsikia Mungu akisema “Panda Huko Juu Tena.” Jinsi inavyomaanisha kujua ya kwamba kizazi chetu hakikosi nabii aliyetumwa na Mungu! Na kwa kweli sisi sote tunashangilia kumwona Mungu Mwenyewe akijidhihirisha mionganoni mwetu, katika upendo, akituleta kwenye umoja wa imani. Ninaamini ninajua kabisa ninachopaswa kutarajia wakati Mungu anaponena na kumtuma mtumishi Wake katika mji fulani—tunaweza kutarajia kusikia kutoka mbinguni.

Yesu Kristo, yeche yule jana, leo, na hata milele. Jinsi haya yalivyo ya kweli. Ningi hesabu kwamba ni baraka kuwaambia walio wagonjwa ama wanaoteseka ya kwamba Yesu Kristo aliniponya wakati mabingwa wa madawa wasingeweza kufanya lo lote. MUNGU asifiwe! Upeo wa mwanadamu ni fursa ya MUNGU.

Katika mwaka wa 1952, nilianza kuumwa na kichwa mara kwa mara. Maumivu yaliendelea kuongezeka wakati uliposonga mbele na nikaanza kupatwa na vipindi nya kuzirai vilivyokuja bila onyo. Hisi ya akili timamu iliniacha na nikaendelea kuumwa na kichwa zaidi na zaidi. Katika wakati huu nilitaka ushauri kutoka kwa daktari wa familia yetu mara nyingi. Alishauri nimtake shauri mpimaji wa macho na anichunguze macho kabisa. Hili lilifanyika lakini huyo mehunguzi wa macho asingepata uhusiano wo wote kati ya kuumwa kwangu na kichwa na macho yangu. Mara nyingi daktari wetu alishauri niende kwenye kliniki nzuri nifanyiwe uchunguzi kamili wa mwili mzima. Hatimaye katika mwezi wa Julai mwaka wa 1954 aliniambia asingeweza kunifanyia jambo lo lote na akanisisitiza niende kwenye Kliniki ya Mayo huko Rochester, Minn. Nilikuwa nimechoka sana wakati wote na vipindi vilikuja mara kwa mara zaidi. Ilinibidi kuacha kuendesha gari letu kwa ajili ya vipindi hivyo na kutoona vizuri. Wakati wangu mwangi ulitumika kitandani bali ilionekeana kana kwamba sikuweza kupumzika.

Hatimaye katika mwezi wa Okt. mwaka wa 1954 nilienda kwenye Hospitali ya Kumbukumbu ya Vita huko Soo, Michigan. Nilitumia siku nane kule nikifanyiwa uchunguzi

mkamilifu wa mwili mzima. Daktari tuliyekuwa naye tulipokuwa kwenye hospitali hii alikuwa ni mtu niliyekuwa nimemjua kwa miaka mingi nami nilikuwa nimeamini na kuheshimu ustadi wake. Aliponiachilia nitoke hospitalini, ye ye pia alishauri niende kwenye kliniki kwa ubainishaji wa ugonjwa. Alisema aljisikia kwamba ulikuwa ni mbaya sana.

Des. mwaka 1954 nilikubali kwenda kwenye Kliniki ya Mayo. Siku ilipangwa nami nilitumia karibu majuma mawili nikipitia kwenye uchunguzi na uangalizi wa makini. Majaribio ya mwisho kwenye jengo la Sayansi ya Madawa yalikuwa ni pamoa na kurekodi kwa mtambo wa kuchunguza kichwa ambako kwa kawaida kunajulikana kama jaribio la wimbi la ubongo. Siku mbili au tatu baadaye nilirudishwa tena kwenye hilo jengo la Sayansi ya Madawa ambako kuchunguzwa kwa kichwa kulirekodiwa chini ya dawa fulani ya kuchochea, ambayo inaitwa Metrazel. Maoni yao baada ya uchunguzi huo wa kliniki yalikuwa ya kwamba nilikuwa na uvimbe ubongoni, ndilo shinikizo lililonifanya kuzirai.

Nilirudi nyumbani nikiwa mgonjwa na mwenye kuvunjika moyo. Mume wangu ambaye mara nyingi alikuwa amenisikia nikisimulia ambavyo Yesu Kristo alivyoponya jinsi ile ile alivyoponya katika siku za Biblia alinipata changamoto kumwamini Mungu kwa uponyaji wangu. Hajawahi kamwe kuhudhuria kanisa lililofundisha uponyaji wa Kiungu ila mara nyingi nilikuwa nimewambia kuhusu marafiki wangu waliokuwa wamewamini Mungu kwa ajili ya kila kitu. Alikuwa tayari kumwamini Mungu kwa ajili ya uponyaji wangu. Aliniambia ya kwamba angenipeleka mahali po pote kama tu tungaliweza kujuwa mahali ambapo patafanyika mkutano. Mara nyingi nilikuwa nimeambiwa juu ya mhudumu aliyewaombea wagonjwa kwa jina la Kasisi Wm. Branham. Tulikuta kwamba atakuwa akihudumu kwenye Kanisa la Filadelfia huko Chicago, tarehe 12 Jan., mwaka 1955.

Laiti Mungu atayarehemu tu maisha yangu kusudi nipate kuhudhuria mikutano hiyo. Ndugu yangu na mkewe walikuja nyumbani kutoka California kutusaidia na kututia moyo. Kulikuwako pia na mtakatifu mpendwa wa Mungu aliyeishi hapa wakati mume wake alipokuwa akiangalia kazi iliyokuwa ikifanywa kwenye Daraja la Mlango Bahari wa Mackinac. Jina lake lilikuwa ni Bibi J. A. Hightower kutoka Memphis, Tenn. Alikuwa ameponywa kansa kwa hiyo angeweza kunena kutokana na tukio lake la kuponywa. Aliyutiwa nami kwa njia maalum na akaomba na kunitia moyo nimwamini Mungu. Marafiki wangu watatu ama wanne wangekuja nyumbani kwangu na kuniombea na Mungu angekutana nasi katika njia ya thamani sana. Jinsi ninavyomshukuru Mungu kwa ajili ya mashujaa wa maombi.

Katika wakati huu nilikuwa nikipoteza ratili moja kwa siku. Katika tarehe 10 Jan., mwaka wa 1955 tuliondoka nyumbani kwetu kwa ajili ya mikutano ya Wokovu na Uponyaji iliyokuwa ifanyike huko Chicago na Ndugu Branham. Majirani zetu walidhani kwamba hiyo ni ziara ya kijinga ambayo mume wangu angenichukua kusafiri safari ndefu namna hii katika hali zangu. Tunaishi yapata maili 500 kutoka Chicago. Ilituchukua siku mbili kufanya safari hiyo. Mara nyangi nilifikiri mauti yangenichukua kabla hatujafikia kikomo chetu cha safari.

Tarehe 13 Jan. kama saa 4 asubuhi tuliwasili kwenye Kanisa la Filadelfia. Watu wangu waliulizia juu ya Ndg. Branham nao wakaambiwa tusingeweza kumwona mpaka kwenye ibada ya jioni. Baadhi ya vijana wanaume waliokuwa wakihudhuria Shule ya Biblia ya Kanisa hilo walipendekeza ya kwamba niletwe kwenye chumba cha kanisa cha maombi ambamo ningeweza kupumzika mpaka kwenye ibada ya jioni. Alasiri paroko wa chuo hicho alingia na alipoona hali yangu aliomba ya kwamba Mungu angeyahifadhi maisha yangu mpaka kwenye ibada ya jioni.

Wakati ibada hiyo ilipoanza niliwekwa kando ya madhabahu juu ya kitanda kidogo. Katika wasaa wangu wa kujitambua nilimwomba Mungu amwokoe mume wangu na kuuponya mwili wangu. Ilionekana kana kwamba nilikuwa tu nina nusu-fahamu zangu tu. Mwili wangu ulijisikia baridi na uliokufa ganzi. Jasho baridi lilijaa mwilini mwangu mwote.

Baada ya Ndg. Branham kutoa ujumbe wake, aliitisha mstari wa maombi. Wakati alipokuwa akiwaombea watu kwenye mstari wa maombi, Mungu alianza kumwonyesha jambo fulani. Aliwaomba wasikilizaji wawe na kicho. Alisema, ‘Ninaona jengo kubwa lenye mnara mrefu mno. Jengo hili liko katika mji fulani, mji huo uko kwenye bonde. Ni Kliniki ya Mayo huko Rochester, Minn. Ninamwona mwanamke ambaye anapelekwa kwenye kliniki hii na mpenzi wake. Anatokea Michigan. Alirudishwa nyumbani kutoka kwenye kliniki hii. Ana ugonjwa wa ubongo ambao unasababisha shinikizo la damu. Ndugu Branham ndipo akaangalia kote kwa wasikilizaji na ananiona kwenye kitanda kidogo na kusema, ‘Mungu akubariki, Dada uliye juu ya machela, ni wewe. Amka, chukua kitanda chako na utembee. Yesu Kristo amekuponya. Nenda zako nyumbani, wewe ni mzima na Mungu akubariki.

Wakati Roho Mtakatifu alipokuwa akizungumza kuitia kwa Ndg. Branham nilijisikia kana kwamba mkono ulikuwa umewekwa juu ya kichwa changu. Nisingeweza kamwe kuelezea jinsi nilivyojisikia. Maneno hayawezi kusimulia mguso huo. Ilikuwa ni kama kwamba moto utakasao ultoka utosini mwa kichwa changu ukapitia kwenye nyayo za miguu

yangu. Nguvu na uwepo wa Bwana ulishuka juu yangu, nguvu zilipitia mwilini mwangu nami niliponywa kabisa. Jinsi ninavyomshukuru Mungu kwa ajili ya wema Wake kwangu.

Usiku huo mume wangu alimkubali Bwana kama Mwokozi wake na ni shauku yetu kumtumaini mpaka atakapotuita twende nyumbani.

Ninaandika ushuhuda huu miaka mitatu baada ya uponyaji wangu na ninataka kumshukuru Mungu kwa kuwa kamwe sijapata kuumwa na kichwa wala maumivu ya namna yo yote kichwani mwangu. Ninaweza kusema hakika Yesu Kristo ni Mwokozi wangu, Mponyaji, Mbatizaji na Rafiki. Yeye ni yote katika yote kwangu. Ni ombi langu kwamba ushuhuda huu uweze kumsaidia mtu fulani kumwamini Mungu ambaye hufanya mambo yote vizuri.

Dada yenu katika Kristo
Bibi Wesley Eveleigh
890 No. State St.
St. Ignace, Mich.

T.D. Ningetaka kumshukuru Ndg. Jos. Mattson Bose, mchungaji wa Kanisa la Filadelfia huko Chicago kwa utu wake na maneno ya kutia moyo wakati nilipoyahitaji sana. Maombi yetu ni kwamba Mungu ambariki.

Kuna zaidi ya jumbe 1179 asili za Kiingereza za Kasisi William Marrion Branham zilizorekodiwa na zinapatikana katika vielelezo vyta kusikia. Nyingi za jumbe hizi zinapatikana katika vitabu. Kuna maofisi na maktaba za kuazimisha katika mataifa kote ulimwenguni ambamo jumbe hizi zinapatikana kwa urahisi katika lugha nyingi.

SWAHILI

©2020 VGR, ALL RIGHTS RESERVED

Kwa maelezo zaidi ama kupata jumbe za Kasisi Branham waombwa kuwasiliana na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Ilani ya haki ya kunakili

Haki zote zimehifadhiwa. Kitabu hiki kinaweza kuchapishwa kwa matbaa ya nyumbani kwa matumizi ya kibinafsi ama kusambaza, bila malipo, kama chombo cha kuitangazia Injili ya Yesu Kristo. Kitabu hiki hakiwezi kikauzwa, kunakiliwa kwa wingi, kuwekwa kwenye mtandao, kuhifadhiwa kikatolewe tena, kufasiriwa katika lugha zingine ama kutumiwa kuomba fedha bila idhini halisi iliyoandikwa moja kwa moja kutoka Voice Of God Recordings®.

Kwa habari zaidi ama kwa vifaa zaidi, tafadhali wasiliana na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org